



**Republika e Kosovës**  
**Republika Kosovo-Republic of Kosovo**  
**Kuvendi - Skupština – Assembly**

**LEGJISLATURA V**  
**Sesioni vjeshtor**

**Komisioni për Bujqësi, Pylltari, Mjedis dhe Planifikim Hapësinor**  
Mbledhja nr. 49  
Prishtinë, më 1.11.2016, ora 13:00  
Ndërtesa e Kuvendit, salla S2

**PROCESVERBAL**

Në mbledhje morën pjesë: Duda Balje, Adem Salihaj, Emilija Rexhepi, Salih Salihu, Shaip Muja dhe Time Kadrijaj, Haxhi Shala.

Munguan: Murat Hoxha, Sergjan Popoviç.

Stafi mbështetës i Komisionit: Bajram Badivuku dhe Ylber Sherifi.

Mbledhjen e kryesoi, **Duda Balje**, kryetare e Komisionit.

**Në këtë mbledhje u propozua ky rend i ditës:**

1. Miratimi i rendit të ditës;
2. Miratimi i procesverbalit të mbledhjes së datës 21.10.2016;
3. Shqyrtimi i Projektligjit për Obiliqin;
4. Shqyrtimi i Projektligjit për zhurmën;
5. Të ndryshme.

Kryesuesja **Duda Balje**, konstatoi se janë plotësuar kushtet për fillimin e punës dhe hapi mbledhjen.

## **1. Miratimi i rendit të ditës**

Rendi i ditës për këtë mbledhje u miratua pa ndryshime.

## **2. Miratimi i procesverbalit të mbledhjes së datës 21.10.2016**

Procesverbali i mbledhjes dt. 21.10.2016, u miratua pa vërejtje.

## **3. Shqyrtimi i projektligjit për Obiliqin**

Kryetarja **Duda Balje** lidhur me këtë pikë japi fjalën kryesuesit të GP z. **Shaip Muja** i cili arsyetoi punën e grupit punues për ndryshime në këtë projektligj pasi janë tërhequr amendamentet nga komisionet e përhershme, ndaj sqaroi detalisht për ndryshimin në Amendamentin 9 dhe 10 të cilat sërish do të përcjellën komisioneve të përhershme. Amendamentet me këto dy ndryshime janë si vijon :

### **Amendamenti 1**

Në preambulë fshihet fjalia “Me qëllim të krijimit të standardeve mjedisore në harmoni me ato të Bashkimit Evropian,”

### **Amendamenti 2**

Neni 1, riemërohet dhe riformulohet si vijon :

#### **Qëllimi**

Ky ligj ka për qëllim përcaktimin e Komunës së Obiliqit dhe rrethit të tij si zonë me rrezik të veçantë mjedisor, si pasojë e ndotjes së vazhdueshme të ajrit, tokës dhe ujit si dhe përmirësimin e kushteve mjedisore, që lidhen me cilësinë e jetës dhe mbrojtjen e shëndetit të njeriut.

### **Amendamenti 3**

Neni 2, riformulohet si vijon :

#### **Fushëveprimi**

1. Me këtë ligj rregullohen kushtet e përgjithshme për përcaktimin e zonës së rrezikuar mjedisore të komunës së Obiliqit dhe rreth saj, mënyra e financimit, si dhe mekanizmat institucionalë për zbatimin e këtij Ligji, nëpërmjet të:
  - 1.1. përcaktimit të kufijve të zonës së rrezikuar dhe të mbrojtur nga ndotja e mjedisit që vjen si rezultat i aktiviteteve të drejtpërdrejta dhe të tërthorta të termocentraleve dhe operatorëve të tjerë ndotës që operojnë në zonën e Obiliqit dhe rreth saj;
  - 1.2. përcaktimit të rrezes së Zonës së Rrezikuar, duke u bazuar në masën e ndotjes dhe në shkallën e rrezikshmërisë;
  - 1.3. përcaktimit të përgjegjësisë institucionale dhe shtetërore për inicimin dhe realizimin e politikave të veçanta, duke ua përshtatur specifikave të zonës së ndotur dhe të rrezikuar;
  - 1.4. përcaktimit të institucioneve përgjegjëse dhe masave të nevojshme për trajtimin dhe përdorimin e gropave të mihjeve, grumbujve të hirit dhe thëngjillit;
  - 1.5. krijimit të politikave dhe veprimeve të nevojshme institucionale në dobi të banorëve duke trajtuar nevojat e tyre shëndetësore që vijnë si rezultat apo si pasojë e jetesës në mjedis të ndotur;
  - 1.6. ndërtimit të mekanizmit financiarë për realizimin e politikave shtetërore në funksion të përcaktimit dhe menaxhimit të zonës me status të veçantë mjedisor.
  - 1.7. ofrimit të mundësisë për qasjen e komunës së Obiliqit në projektet e kogjenerimit

#### Amendamenti 4

**Neni 3**, riformulohet si vijon :

1. Shprehjet e përdorura në këtë ligj kanë këto kuptime:

- 1.1. **“Banorë”** janë banorët e përhershëm që jetojnë në Zonë;
- 1.2. **“Zona”** është zona e rrezikuar mjedisore e Obiliqit dhe rreth tij;
- 1.3. **“Komuna”** është Komuna e Obiliqit;
- 1.4. **“Ministria”** është Ministria përgjegjëse për Mjedis dhe Planifikim Hapësinor;
- 1.5. **“Qeveria”** është Qeveria e Republikës së Kosovës
- 1.6. **“Mjedis”** është rrethina natyrore: ajri, toka, uji, klima, flora dhe fauna, në tërësinë e ndërveprimet dhe trashëgimia kulturore si pjesë e rrethinës të cilën e ka krijuar njeriu;
- 1.7. **“Rripi i sigurisë”** është një rrip dhe përreth burimit të ndotjes, me lartësi të nevojshme, të gjelbëruar me bar dhe drunj, i cili do të ndikonte në zvogëlimin e ndotjes akustike dhe formave të tjera të ndotjes;
- 1.8. **“Ndotja e mjedisit”** është ndikimi i drejtpërdrejtë ose i tërthortë të materieve ndotëse në mjedis, të shkaktuara përmes aktiviteteve të personave juridikë e fizikë që kanë pasoja të dëmshme në cilësinë e mjedisit dhe në shëndetin e njeriut;
- 1.9. **“Operatorë ekonomik”** janë kompanitë që veprojnë në zonë, e të cilat me ushtrimin e aktivitetit të tyre shkaktojnë dëme në mjedis;
- 1.10. **“Burim i ndotjes”** konsiderohen: Mihjet sipërfaqësore; Gropat e mihjeve; Grumbujt e hirit dhe thëngjillit; Termocentralet; Deponite e mbeturinave.
- 1.11. **“Granti për Zonën e Veçantë”** është grant i veçantë, i cili ndahet nga Qeveria e Republikës së Kosovës për Zonën e Rrezikuar Mjedisore të Obiliqit dhe rreth tij.

#### Amendamenti 5

**Neni 4, Paragrafi 1 dhe 2** bashkohen dhe riformulohen si vijon:

**Komuna e Obiliqit shpallet si zonë me status të veçantë mjedisor në Republikën e Kosovës.**

#### Amendamenti 6

**Neni 5**, riformulohet :

##### **Zona e rrezikuar mjedisore**

1. **Zona e rrezikuar mjedisore përfshinë rrezen në distancë ajrore deri pesëmijë ( 5.000 ) metra nga pika në mes dy termocentraleve në Obiliq.**
2. **Komuna në bashkëpunim me Ministrinë, përcakton prioritetet për investime brenda zonave të përcaktuara, në bazë të shkallës së ndotjes.**

#### Amendamenti 7

**Neni 6**, riformulohet titulli i nenit :

**“Masat mbrojtëse nga burimet e ndotjes”**

**Paragrafi 1**, në rreshtin e parë pas fjalës **“Ministrinë”** fshihet **“si dhe në konsultim me Komisionin Mbikëqyrës Qendror Shtetëror,”**

**Paragrafi 2**, hiqet **“sidomos arritjen e qëllimeve si në vijim.”**

**Nënparagrafi 2.1.** fjala **“evropiane”** bëhet **“mjedisore”**.

#### Amendamenti 8

**Neni 7, Paragrafi 1,**

Në rreshtin e dytë pas lidhëses **“me”** shtohet **“Komunën dhe”** dhe vazhdon teksti.

**Paragrafi 2**, në fillim **“Komuna, në bashkëpunim me Ministrinë, bën”** riformulohet **“Komuna dhe Ministria bëjnë”**.

**Paragrafi 3**, Pas fjalës **“Ministrisë”** shtohet **“dhe operatorëve ekonomik”**.

**Paragrafi 4**, pas fjalës **“akustike”** pjesa tjetër riformulohet si vijon: **“nga termocentralet, duke instaluar pajisje të nevojshme për realizimin e qëllimit të tillë sipas Ligjit për Mbrojtjen nga Zhurma.”**

## Amendamenti 9

Neni 8, riformulohet si vijon :

**Masat shtesë për përmirësimin e jetës së banorëve të Zonës së Veçantë**

1. Qeveria në bashkëpunim me Komunën, krijon lehtësira të vazhdueshme për banorët e Zonës së Veçantë,
2. **Qeveria në bashkëpunim me Zyren e Rregullatorit të Energjisë siguron:**
  - 2.1. një kuotë më të ulët të çmimit për energji elektrike,
  - 2.2. furnizim të rregullt me energji elektrike për banorët e zonës.
3. **Qeveria në bashkëpunim me operatorët siguron:**
  - 3.1. Trajtim me përparësi në kushte të barabarta, për ata që janë banorë të zonës së veçantë së paku 5 vite, në procedurat e punësimit për profesionet dhe vendet e punës që gjenerohen nga mihjet sipërfaqësore dhe prodhimi i energjisë elektrike, në përputhje me procedurat ligjore të Republikës së Kosovës.
  - 3.2. Mundësi qasjeje në shfrytëzimin e avullit të termoelektranave për ngrohje qendrore.
4. Komuna, në bashkëpunim me **operatorët ekonomik**, përcakton dhe zbaton politika të vazhdueshme në krijimin e infrastrukturës dhe stimulimin e aktivitete të veçanta sportive dhe kulturore.

## Amendamenti 10

Neni 9, teksti i nenit riformulohet si vijon :

1. **Mjetet financiare të dedikuara për zonën e veçantë sigurohen prej :**
  - 1.1 **Inkasimit të rentës minerale nga institucioni përkatës, 20% e vlerës së kësaj rente rialokohet nga Buxheti Qendror për Buxhetin Komunal të Komunës ku ndodhet njësi biznesore, e dedikuar në mënyrë specifike për investime në zhvillimin e komunitetit në lokacionin ku ndodhet njësi biznesore në fushën e mbrojtjes së mjedisit, infrastrukturës, sport, shëndetësi dhe arsim.**
  - 1.2 **Donacioneve.**

## Amendamenti 11

Neni 10, riformulohen paragrafët si vijon:

**Paragrafi 1.** pas fjales “mjedisit” shtohet “ dhe planifikimit hapësinor”

**Paragrafi 3,** fshihet

**Paragrafi 4.** në fund të fjalise pas lidhëses “dhe” pjesa tjetër riformulohet si vijon: “**Ligjin për menaxhimin e financave publike dhe përgjegjësitë si dhe Ligjin për financat e pushtetit lokal.**”

**Paragrafi 5,** pas fjalës “Ligji” pjesa tjetër e tekstit fshihet.

## Amendamenti 12

Neni 11, fshihet

## Amendamenti 13

Neni 12, riformulohet si vijon :

**Qeveria dhe ministrinë përkatëse me Komunën brenda gjashtë ( 6 ) muajve nga data e hyrjes në fuqi të këtij ligji nxjerrin aktet nënligjore për zbatimin e këtij ligji.**

Në fund **Shaip Muja** nuk e arsyetoi angazhimin e MMPH në këtë ligj lidhur me Haden ngase vetëm komplikohen çështjet edhe ashtu të komplikuar. Për këtë ndërhyrje u pajtuan edhe **Duda Balje, Time Kadrijaj, Adem Salihaj** dhe shtuan se ligji për Obiliqin

është me rëndësi të përfundoj me leximin e dytë ngase ka mjaft sfida të veta dhe mos të shtohen ende të tjera.

**Raif Qela**, deputet iniciues i këtij ligji, ndërhyri dhe sqaroi se këto ndryshime që inician ky komision i mirëpret dhe vlejné për rentën minerale, ndaj sugjeroi që me këto ndryshime të dërgohen rekomandimet sërish në komisionet e përhershme. **Xhafer Gashi** – kryetar i komunës Obiliq i cili ishte prezent, falënderoi për këtë punë të komisionit dhe uroi suksese në përfundimin e këtij ligji shumë të rëndësishëm.

#### **4. Projektligji për Zhurmën**

**Kryesuesja** e GP për Zhurmën **Emilija Redzeqi** fillimisht njoftoi komisionin deri ku është shqyrtuar ky projektligj si dhe vërejtjet që janë parashtrua, kurse **Adem Salihaj** parashtrroi sugjerimet e tij për propozim amendamentet nga ai, ndaj komisioni kërkoi që këto vërejtje të renditen dhe të shqyrtohen komplet në mbledhjen e radhës duke ftuar edhe përfaqësuesin e MMPH.

#### **5. Të ndryshme**

**Kryetarja** në kuadër të pikës të ndryshme ftoi **Shaip Mujën** për sqarimin deri ku ka mbëri GP rreth hartimit të Ligjit për kompleksin Adem Jashari, ndërsa z. Muja propozoi komisionit që të konstatoi të përfunduar këtë draft dhe të procedoi më tutje për miratim.

**Komisioni miratoi përfundimin e draftit dhe e njëjta dërgohet departamenteve kompetente për të përfunduar dhe kompletuar si draft ligj.**

**Adem Salihaj** propozoi për mbledhjen e radhës të shqyrtohet importimi i fidaneve të sëmura me kancerë dhe premtoi se do ti dërgoi kryetares propozimin e arsyetuar, në mënyrë që komisioni pastaj në një mbledhje të ftoi kompetentët për këtë çështje siç janë MB dhe AUV.

**Kryetarja** premtoi se në vazhdim do të bashkërendit me stafin çështjet të cilat duhet të shqyrtohen në komision, ngase ka mbërijtur edhe raporti vjetor për mjedis i cili duhet të shqyrtohet bashkërisht me ministrin e MMPH, që do të thotë se komisionin e presin : shqyrtimi i projektligjit për Zhurmën, shqyrtimi i raportit mjedisor, iniciativa e z. Salihaj, çështja e papërfunduar e Hades (rekomandimi për plenare).

Mbledhja përfundoi në orën 14:30.

**E përgatiti:**

**Stafi mbështetës i Komisionit.**

Kryetarja e Komisionit,  
**Duda Balje**